

समे — 12:25

<><><><><><>

PM-CS Conference

प्रधानमंत्री नरेन्द्र मोदी होर अज्ज नमीं दिल्ली च मुख्य सचिवें दे चौथे राष्ट्रीय सम्मेलन दी अध्यक्षता करगन। सम्मेलन दा मकसद सहकारी संघवाद पर ध्यान केन्द्रित करदे होई केन्द्र ते राज्यें बश्कार सांझेदारी गी होर निगगर करना ते तेजिया कन्नै बरोस ते विकास हासल करने लेई बेहतर साथ सैहयोग जकीनी बनाना ऐ। मुख्य सचिवें दा पैहला सम्मेलन जून 2022 च धर्मशाला च लग्गा हा, जेहदे बाद दूआ सम्मेलन जनवरी 2023 च दिल्ली ते त्रीया पिछले बरे दिसम्बर महीने दिल्ली च गै सददेआ गोआ हा।

<><><><><><>

LS-Constitution

भारतीय संविधान दे 15एं बरे दी गौरवशाली यात्रा पर लोकसभा च चर्चा जारी ऐ। अज्ज दपैहीह मगरा प्रधानमंत्री नरेन्द्र मोदी होर चर्चा पर अपना परता देंगन। संविधान गी अपनाएं जाने दे 75एं बरे पूरे होने दे मोके पर कल लोकसभा च दऊं दिनें दी चर्चा दी शुरूआत होई ही। राज्य सभा च बी संविधान पर विशेष चर्चा अत्तरूं संगारे शुरू होई जेहड़ी दऊं दिनें तोड़ी जारी रौहग। प्रधानमंत्री होर राज्यसभा च इस चर्चा दा परता मंगलवारें देंगन।

<><><><><><>

DC Rajouri

राजौरी दे जिला विकास कमीशनर अभिषेक शर्मा होरें डाक्टरें दी इक टीम गी लेइयै कल जिले दे कोटरंका दे दूर दरेड़े गां बघाल दा दूई बारी दौरा कीता ते उत्थें दऊं परोआरें च होई दी मौत आली घटना दे सरबंधें च जांच ते पुच्छ पड़ताल कीती। उने परिवार आलें कन्नै गल्लबात कीती ते खाने पीने गी लेइयै एहतियात बरतने बारे लोकें गी जागरूक कीता। उनें गां दे लोकें गी जकीनी दोआया जे चनौती दे इनें हालात च प्रशासन हुंदे कन्नै ऐ। ध्यानजोग ऐ जे इस गां च किश राज पैहले संदिग्ध तौरा पर खरा रूट्टी खाने कारण इक

आदमी दी मौत होई ही। पर ओहदे बाद संदिग्ध हालात च इक होर मौत दे बाद माहिरें दी टीम गी उत्थें जांच लेई भेजेआ जिन्ने पानी ते रूट्टी दे नमूने लेइयै फारेंसिक लैब च भेजे न। जांच कारवाई राजोरी दे सीएमओ मनोहर राजा हुंदी दिक्ख रिक्ख च कीती जा'रदी ऐ।

<><><><><><><>

National Youth Festival

जम्मू कश्मीर थमां 30 विद्यार्थिएं नमीं दिल्ली च 11 ते 12 जनवरी गी होने आले 28में राष्ट्रीय युवा महोत्सव च हिस्सा लैने लेई चुने गे न। इंदे चा 10 जनें लोक गीत च 10 जनें लोक नाच रु ते 2-2 जनें चित्रकारी, कविता लेखन भाषण, कहानी लेखन ते विषे विशेष पर अभिव्यक्ति लेई चुने गे न। इनें चुने गेदे विद्यार्थिएं गी ममारकबाद दिंदे युवा सेवाएं ते खेड्डें दे सचिव सरमद हफीज होरें आखेआ जे प्रधानमंत्री नरेन्द्र मोदी हुंदी मजूदगी च ओने आले महोत्सव च हिस्सा लैता प्रतिभागिएं लेई इक सुखने दे सच होने आला त'लेखा होग। उनें आखेआ जे इस चाल्ली दिएं प्रतियोगिताएं राएं सरकार दा मकसद नोजवानें गी हुनर, ज्ञान ते आत्मविश्वास कन्नै सशक्त बनाना ऐ तां जे ओ अपने समुदाय च अगुवाह् दी भूमका नभान ते बदलाव आनने आस्तै बनी सकन।

<><><><><><><>

VCs Terms Extended

जम्मू यूनिवर्सिटी दे वाइस चांसलर प्रो. उमेश राय हुंदा कार्यकाल होर त्रऊं ब'रे लेई बघाई दित्ता गेआ ऐ, जिसलै जे शेर-ए-कश्मीर एग्रीकल्चर यूनिवर्सिटी कश्मीर दे वाइस चांसलर प्रो. पजीर गनेई हुंदा कार्यकाल बी दऊं ब'रे लेई बघाया गेआ ऐ। जानकारी मूजब उपराज्यपाल मनोज सिन्हा हुंदे पास्सेआ एह हुक्म दौनें वाइस चांसलरें लेई भेजी दित्ते गे न।

<><><><><><>श

Javed Rana

पर्यावरण मंत्री जावेद अहमद राणा होरें कल इक हुक्म जारी कीता जेहदे तैहत्त मेंढर इलाके च जिमीं घसने दे कारणें दा पता लाने लेई तफसील कन्नै जांच कीती जा। मंत्री होरें आखेआ जे जिमीं घसने करी होए दे नुक्सान दा जायजा लैता जा ते एहदे खलाफ आपदा

प्रबंधन दा इक मजबूत तंत्र बनाने दा जतन कीता जा। जावेद अहमद राणा होरें एह हुक्म सिविल सचिवालय च होई दी इक बैठक च दित्ता। मंत्री होरें अगगे आखेआ जे इस खित्तै ने 90 दे दहाके कश बार-बार होने आली लास पस्सिएं ते लितीं घसने दिएं घटनें गी झेल्लेआ ऐ ते इंदे कन्नै बसनीकें गी जान-माल दा काफी नुक्सान दिखना पेआ ऐ।

<><><><><><><>

DC Poonch

डिप्टी कमीशनर पुंछ विकास कुंडल होरें इक बैठक लाइयै श्रम विभाग दी बक्ख-बक्ख स्कीमें तैह्त्त होआ'रदे कम्में दा जायजा लैता ते स्कीमें तैह्त्त दित्ते गेदे लाह् बारे बी जानकारी हासल कीती। इस बैठक च स्थानीय श्रमिकें आस्तै सेवाएं च बाद्धा करने पर जोर भरेआ गेआ। कुंडल होरें सहायक श्रम आयुक्त होरें गी जोर देइयै आखेआ जे सारे योग्य श्रमिकें गी लाह्कारी स्कीमें दा फायदा थोई सकै। डीसी होरें रमिकें दी सहूलियत आस्तै इक हैल्पलाइन स्थापित करने दे निर्देश बी दित्ते। एह्दे कन्नै उनेंगी अपने हक ते सेवा प्राप्त करने च कोई रुकावट दा सामना नेई करना होग। विकास कुंडल होरें मजदूरें तोड़ी सरकारी लाह्कारी स्कीमें दा फायदा पजाने आस्तै वचनबद्ध गी दोहराया।

<><><><><><><>

Women Cricket Team

वेस्टइंडीज़ कन्ने खेड्डे जाने आली टी-20 ते इक रोजा मैचें दी श्रृंखला लेई ताल कमेटी आस्सेआ 15 मिनबरी भारतीय महिला टीम दी ताल करी लैती गई ऐ। टीम दी कप्तानी हरमनप्रीत कौर गै करगन जिसलै जे आस्ट्रेलिया खलाफ पिछली इक रोजा मैच दी श्रृंखला च सेंचरी बनाने आली समृति मंधाना उप-कप्तान होंगन। भारतीय ते वेस्टइंडीज़ दी महिला टीमां 15, 17 ते 19 दिसम्बर गी नवीं मुंबई दे डी.वाई.पटेल स्टेडियम च त्रै टी-20 मैच खेडगन। जिसलै जे इक रोजा अंतर्राष्ट्रीय मैचें दी श्रृंखला तैह्त्त 22, 24 ते 27 दिसम्बर गी बड़ोधरा दे कोटम्बी स्टेडियम च मैच खेड्डें जांगन।

<><><><><><><>

Weather

समूलचे जम्मू कश्मीर च सीत च उपरोतली बाद्धा बरोबर जारी ऐ ते रातीं दे तापमान च लगातार कमी दर्ज कीती जा'रदी ऐ। दिने शैल धुप्प दे बावजूद बी कल दिने दा बद्धोबद्ध तापमान 21.9 डिग्री सैलिसयस गै रेहा जिसलै जे जंदी रातीं दा घट्टोघट्ट तापमान 4.5 डिग्री सैलिसयस रिकार्ड कीता गेआ।

<><><><><><>